

**I. ATALA****BIZKAIKO LURRALDE HISTORIKOKO FORU ADMINISTRAZIOA****Bizkaiko Foru Aldundia****Ekonomi eta Lurralde Garapena Sustatzeko Saila**

**Bizkaiko Foru Aldundiaren 27/2019 FORU DEKRETUA, martxoaren 20koa. Honen bidez, 2019ko Berrikuntza eta Inbertsio Aurreratua Sustatzeko 2i Plana arautzen duten oinarriak onesten dira.**

Bizkaian berrikuntzarako politikak egindako ahaleginak eta lortutako emaitzek pizgarria izan behar dute orain arte herri administrazioak eta eragile pribatuek egindako ahalegina sendotzeko; izan ere, enpresa-sare lehiakorraren modernizazioa lortzeko orduan berrikuntzari, enpresen nazioartekotzeari eta inbertsioari lehentasuna ematen diten epe luzeko politiken bidez baino sortzen ez delakoan dago administrazioa; hura da arriskuak saihesteko eta globalizazioak ematen dituen aukerak baliatzeko bide nagusia.

Legegintzaldi honetan, Ekonomi eta Lurralde Garapena Sustatzeko Sail berri bat daukagu, Bizkaiak eta Bizkaiko enpresa- eta ekonomia-sareak dituzten interesen defentsarekin konprometituta dagoena. Horretarako, Bizkaiak industrian eta industriaren lehentasunezko sektoreetan zentratuta dituen indarren aldeko apustu trinko bat egitea proposatzen du, enpresa berritzaileagoak, internazionalagoak eta modernoagoak, kalitatezko enpleguaren sortzaileak lortzeko.

Dekretu hau eta dekretuak lortu nahi dituen helburuak Ekonomi eta Lurralde Garapena Sustatzeko Sailak sustatutako jarduera-multzoaren zati bat dira. Izan ere, programen eta zerbitzuen garapenean sustatzen ditu jarduera horiek, aberastasuna sortzen laguntzeko, Bizkaiko enpresen artean lehiakortasun iraunkorra sustatuta.

Zehazki, Berrikuntza eta Inbertsio Aurreratua Sustatzeko 2i Plan hau hainbat proiektu mota ezberdin jasotzeko diseinatuta dago: produktuaren arloko berrikuntza, prozesuak hobetzen dituzten inbertsioak, merkatura hurbiltzeko hobekuntzak, antolaketaren arloko berrikuntza, gauzen Internet, fabrikazio aurreratua..., beti ere arreta proiektuak enpresa-erentzat duen garrantzian eta izan dezakeen eraginean jarrita.

Aurreko urteetan, berrikuntzaren eta hari lotutako inbertsioen bidez, enpresak merkatuan toki hobeto batera eramateko diren proiektuak tinkotasunez bultzatzen duen laguntza integralen programa bat proposatzeko zeuden berrikuntza sustatzeko eta inbertsioari laguntzeko programen bidez lortutako esperientziaz abiatzen da 2i Plana.

Diru-laguntzen programa honen beste helburu bat da, azken urteetan, Ekonomi eta Lurralde Garapena Sustatzeko Sailaren laguntzen deialdietara aurkeztu dituzten berrikuntza eta inbertsio aurreratuko proiektuak garatu ez dituzten enpresak berrikuntzara erakartzea. Horretarako, ebaluazioan, prima bat emango zaie puntuazioan enpresa horiek aurkeztutako proiektuei.

Laguntza-plan honek, gainera, bat egiten du Zientzia, Teknologia eta Berrikuntzako Euskadi 2020 Planaren barruan ezarritako RIS3 espezializazio adimentsuko estrategian jasotako lehentasunekin, eta arreta berezia jartzen du fabrikazio aurreratuan, Euskadiko Industria 4.0. estrategian azaldutakoaren bidean.

Laburbilduz, laguntza-programa zabal eta ireki bat da, Bizkaiko enpresei merkatuan finkotasunez kokatzen lagunduko dieten berrikuntzarako eta hari loturiko inbertsiorako proiektuen kopuru handi bat erakartzeko asmoarekin jaio dena. Proiektu-kopuru handi bat jasotzeko borondate hori honako honetan islatzen da: enpresako 2 proiektu aurkeztu ahal izango dira.

2018ko ekitalditik, lankidetzan identifikatutako negozio-aukera berritzaileen bideragarritasunari buruzko azterlanak egiteko edo arrisku partekatutako lankidetzako berrikuntza-proiektuak garatzeko, enpresen arteko lankidetzako proiektuak lehiakortasunerako eta lankidetzan sortutako berrikuntzarako Elkarlanean Programaren barruan sartuko



dira. Horregatik, hain zuzen ere, 2i Plan honek, aurreko beste plan batzuen aldean, ez du bere baitan jasotzen enpresen arteko lankidetzazko proiektuak aurkezteko aukerarik.

Azken urteotan, Bizkaiko Foru Aldundiak tresna berritzaileak jarri ditu abian, ekin-tzaitzarako eta enpresen berrikuntzarako finantzazioa errazteko. 2018an, Europako epe luzerako inbertsio funtsetarako (EELIF) zerga-araudi berria onartu zen, eta, Ogasuneko Zuzendaritza Nagusiaren ekainaren 18ko 14/2018 Ebazpenaren bidez, izaera hori aitortu zitzaion EELIF Berrikuntza Funtza deritzonari (IFZ: V-95920310), zeina Solventis SGII Cek kudeatu eta Elkargi EEEK merkaturatzen duen. Funtz horren bitartez, maileguak ematen zaizkie berrikuntza teknologikoko proiektuak egiten dituzten enpresa txiki eta ertainei, martxan jartzen laguntzeko. 2019an, 2i programak berritasun gisa jasotzen du laguntzaren onuradun diren proiektuek beste laguntza hau ere jaso dezaketela: proiektua finantzatzeko maileguaren finantza-gastuetarako diru-laguntza, EELIF Berrikuntza Funtzaren kargura; betiere, mailegua ematen baldin bada.

Bizkaiko Foru Aldundiko Gobernu Kontseiluaren 2019ko otsailaren 26ko erabaki baten bidez, lankidetzazko hitzarmena sinatu dute Bizkaiko Foru Aldundiak eta Elkargi EEEK, 2i programaren esparruan lagundutako proiektuak gauzatzeko maileguei buruzko informazio-trukea egiteko, eta diru-laguntzaren ordainketa egiteko EELIF Berrikuntza Funtzaren kargura.

Programa hau Euskadiko Feder 2014-2020 Programa Eragilearen bidez ere finantzatu da, Feder Landa Garapenerako Europako Funtzaren arloan. Une oro begiratuko da europar politikak bete daitezela; batez ere, honako alderdi hauetan: ingurumena, auke-ra-berdintasuna, kontratazio publikoa eta europar kofinantziarioaren publikitateak.

Dekretu honetan, genero-ikuspegia jasotzen da, bai hura prestatzeko orduan bai haren aplikazioan, Emakumeen eta Gizonen Berdintasunerako ekainaren 20ko 4/2018 Foru Arauan (aurrerantzean 4/2018 Foru Arauan) ezarritakoarekin bat. Gainera, kontuan hartu da 4/2018 Foru Arauaren 25. artikuluan eta Bizkaiko Foru Aldundiaren azaroaren 19ko 141/2013 Foru Dekretuan xedatutakoa; izan ere, haren bidez, generoaren eraginaren aurretzeko ebaluazioa egiteko jarraibideak ezartzen dira; ebaluazio hori Emakumeen eta Gizonen Berdintasunerako otsailaren 18ko 4/2005 Legean (aurrerantzean 4/2005 Legean) dago aurrez ikusita. Ildo horretan, tramitazioan, foru dekretu horren 2. artikuluan aipatzen den txostena sartu da, hau da, generoaren eraginaren aurretzeko ebaluazioari buruzkoa.

Programa horretan, emakumeen eta gizonen arteko berdintasuna sustatzeaz gain, kohesioari laguntzeko, egungo politika publikoen aplikazioa sendotzen duten klausula sozialak sartu dira. Helburu horretarako, diru-laguntzetarako prozeduran klausula sozialak, ingurumenekoak eta beste politika publiko batzuei buruzkoak sartzeko gidaren gomendioei jarraitu zaie, gida horrek erraztu egiten baitu arau hauetan ezarritakoa aplikatzea: Diru-laguntzen Erregelamenduari buruzko martxoaren 23ko 34/2010 Foru Dekretuaren (aurrerantzean, Diru-laguntzen Erregelamendua) 45. artikuluen aldaketak. Foru-dekretu horren bidez, maiatzaren 31ko 5/2005 Foru Araua garatu zen, Foru Administrazioak emaniko diru-laguntzen araubide juridiko orokorra arautzen duena (aurrerantzean, 5/2005 Foru Araua). Adierazitako 45. artikuluko hori otsailaren 27ko 27/2018 Foru Dekretuaren bidez aldatu zen, eta Bizkaiko Batzar Nagusiek 2017ko urriaren 18an onetsitako mozioaren ondorioz izapidetu zen.

Foru dekretu honek bete egiten ditu erregulazio onaren printzipioak, zeinak Administrazio Publikoen Administrazio Prozedura Erkidearen urriaren 1eko 39/2015 Legean (aurrerantzean, 39/2015 Legean) aurreikusten diren eta Bizkaiko Foru Aldundiaren urtarrilaren 17ko 2/2017 Foru Dekretuaren 3. artikuluan jasotzen diren (dekretu horren bidez, Bizkaiko Foru Aldundian xedapen orokorrak egiteko prozedura arautzen da).

Adierazitakoa dela bide, Ekonomi eta Lurralde Garapena Sustatzeko foru diputatuak proposatuta eta aurretik Gobernu Kontseiluak eztabaidatu eta onetsita, Bizkaiko Foru Aldundiak, 2019ko martxoaren 20ko batzarraldian, hauxe,



XEDATU DU:

I. TITULUA

**OINARRIZKO EZAUGARRIAK****1. artikulua. — Foru dekretuaren xedea**

Foru Dekretu honen xedea da 2019. urteko Berrikuntza eta Inbertsio aurreratua Sustatzeko 2i Plana arautzen duten oinarriak eta planean jasotako diru-laguntzen lehen deialdia onartzea.

## I. KAPITULUA

**BERRIKUNTZA PROIEKTUREN GAUZATZE KOSTUENTZAKO DIRU LAGUNTZAK****2. artikulua. — Helburuak**

Laguntzen programa honen asmoa Bizkaiko enpresen berrikuntzako, teknologikoki aurreratua diren ekoizpen-inbertsioak egiteko eta lehiakortasuneko gaitasuna areagotzea da, modu iraunkorrean eta ingurunean integratuta.

Xede horrekin erakunde onuradunei diru-laguntzak eskaintzen dizkie.

**3. artikulua. — Entitate onuradunak**

1. Kapitulu honetan araututako diru-laguntzak eskuratu ahal izango dituzte berezko nortasun juridikoa duten enpresek, jarduera nagusia hauetariko bat badute: industria, eraikuntza, garraioa, industriari lotutako zerbitzuak, turismoa eta handizkako merkataritza (I. eranskinean ageri dira 2009ko Ekonomi Jardueren Sailkapen Nazionalako (EJSN) epigrafeetatik diru-laguntza jaso dezaketenak).

2. Erakunde onuradunak honako baldintza hauek bete beharko dituzte:

- a) Sozietatearen helbidea eta zerga-helbidea Bizkaiko Lurralde Historikoan izatea.
- b) Gutxienez ekoizpen zentro bat edo balio erantsi handiko zentro bat Bizkaiko Lurralde Historikoan izatea.
- c) 5 eta 100 pertsona arteko langile edukitzea, lansaio osokoak urteko kopuru baliokideetan.

Langiletzat joko dira enpresaren jarduerari atxikita dauden baina euren izaeragatik Gizarte Segurantzaren Araubide Orokorrean alta emanda egon ezin diren langile autonomoak.

Ez dira plantillakotzat joko atzerriko instalazioetan lan egiteko kontratatu diren langileak.

Seme-alabak edo mendetasuna duten pertsonak zaintzeagatik lansaioaren murrizketen kasuan, erakunde eskatzailearen beraren eskariz, murrizketa kontuan hartu gabe konputatu ahal izango dira lansaio horiek.

- d) Honako bi muga hauetako bat, gutxienez, ez gainditzea, aurkeztutako azken Sozietate Zergako aitopenen arabera:

— Urteko negozio kopurua: 20.000.000 euro.

— Balantze orokorra: 20.000.000 euro.

- a), b) eta c) baldintzak, gutxieneko pertsona kopuruari buruzkoak, eskabidea aurkeztu den unean egiaztatu behar dira, eta ebazpena eman eta ordainketa egin arte eutsi behar zaie. Gehieneko pertsona kopuruari buruzko c) baldintza eta d) baldintza, aldiz, eskabidea aurkeztu den unean egiaztatu behar dira.
- e) Zerga betebeharrak, Gizarte Segurantzarekikoak eta diru-laguntzak itzultzearen ondoriozkoak eguneratuta edukitzea.
- f) Berdintasunerako eskubidea eta sexu-diskriminaziorik eza urratzeagatik zeha-pen irmorik ez izatea administrazio-bidean, edo lan-arloan edo zigor-arloan, eta ez izatea berdintasun-printzipioaren kontrakoak, enpresen helburuetan, onar-



tze-sisteman, funtzionamenduan, ibilbidean edo jardueran sexua dela-eta edo beste edozein egoera zein inguruabar dela-eta diskriminaziorik egiten ez delako.

- g) Ez dagoela Diru-laguntzei buruzko 5/2005 Foru Arauaren 12. artikuluan azaltzen diren inguruabarretako batean ere.

e) f) eta g) baldintzak automatikoki bete beharko dira, eta kasuan kasuko inguruabarrak gertatzen diren bitartean iraungo dute, 5/2005 Foru Arauaren 12. artikuluan ezarritakoaren arabera.

3. Arlo guztietatik kanpo geratzen dira sozietate publikoak, zuzenbide publikoko erakundeak, ondasun erkidegoak eta sozietate zibilak.

4. Diru-laguntzaren bat jasotzen duten erakunde onuradunek 5/2005 Foru Arauaren 13. eta 41. artikuluetan xedatutakoa bete beharko dute. Bereziki, jasotako fondoak zertan erabili diren frogatzen duten agiri guztiak gorde beharko dituzte, agiri elektronikoak barne, finantza-kontrolaren eginkizunak dituzten organoen egiaztapen-jardueren eta kontrol-jardueren xede izan baitaitezke, eta haiei lankidetzak eskaini beharko diete.

#### **4. artikulua. — Diruz lagun daitekeen egitea**

1. Diruz lagundu ahal diren egiteak hauek dira: erakundearen lehiakortasuna edozein arlotan (prozesua, produktua, antolaketa, parte-hartzea, merkatua, jabetzaren babesa) berrikuntza teknologikoko nahiz ez-teknologikoko proiektuen bidez hobetzea helburu duten jarduerak eta inbertsio aurreratuak, baldin eta erakundearen negozio-ereduarekin koherenteak badira eta eragin handia badute.

2. Diruz lagundu ahal diren proiektuek barnean hartu ahal dituzten ekintzen xedek hauek izan ahal dira:

- a) Sozietatearen helbidea eta zerga-helbidea Bizkaiko Lurralde Historikoan izatea.
- b) Produktu edo zerbitzu berriak diseinatzea edo garatzea, edo lehendik zeuden produktuen prestazioak hobetzea, merkatuan txertatu ahal izateko.
- c) Negozio-eredua aldatzea balio erantsi handiagoa duten elementuen salmentara bideratzeko, «zerbitzazioa» barne (produktuen salmenta produktua + zerbitzua binomiora eboluzionatzea da zerbitzazioa).
- d) Berrikuntza, merkatu berrietara irekitzeko eta produktu eta zerbitzuak merkaturatzeko bide berriak sortzeko.
- e) Ekoizpen prozesuetan berrikuntzak txertatzea, edo existitzen den beste baten etapetako batean hobekuntza nabarmenak sartzeko.
- f) Enpresaren lehiatzeko posizioa nabarmen hobetzen duten eta teknologikoki aurreratuak diren industri enpresen ekoizpeneko ekipamenduak modernizatu, hobetu eta zabaltzeko inbertsioak.
- g) Antolakuntzaren eraldaketa, pertsonen eta taldeen protagonismoan oinarrituta, antolakuntzaren eta erakundea kudeatzeko moduen aldaketa-prozesu baten bitartez, hala erakundeko pertsonen modu zabal eta anitzean parte har dezaten proiektu horien gogoeta eta abiarazte prozesuetan.
- h) Europako, nazioarteko edo atzerrian estatuko patenteen eskabideak aurkeztu eta izapidetzea, baita erabilgarritasun ereduak edo diseinuak ere (erkidegokoa, nazioartekoa edo atzerrian estatukoa).
- i) Aurretik egindako azterlanak, enpresak lehiakortasuna handitzeko tresna gisa eskuratzeko, betiere, proiektua berritzailea bada enpresarentzat.

3. Diru-laguntza jasoko duten proiektuak eskabidea egin duen enpresan aplikatu eta ezartzeko modukoa izango da, enpresa bera izango da onuraduna eta bere jarduerarekiko koherentzia mantenduko da, eta soilik hartuko dira diruz laguntzeko modukotzat Bizkaiko Lurralde Historikoko ekoizpen zentroetan zuzenean aplikatzeko diren jardueren gastuak.

4. Nolanahi ere, proiektuak sexu arrazoiengatik ez dira baztertzailak izango, eta ahal dela, sexuaren araberako rolak eta estereotipoak ezabatu beharko dituzte.



5. Honako proiektu hauek ez dira diruz lagunduko:
- a) Erakundearentzat berrikuntzarik ekartzen ez duten proiektuak.
  - b) Produktuaren birdefinizio estetikoa edo industri konplexutasunik gabeko aldaketa, markaren kudeaketa edo nortasun korporatiboaren kudeaketa beste helbururik ez duten proiektuak.
  - c) Produktuen aldaketa errepikariatatik ondorioztatutako proiektuak.
  - d) Bezeroarentzat produktu bakarra diseinatzeko proiektuak garatzea (neurria egindako makinak eta ekipamenduak, «erabiltzeko prest» proiektuak...), erabilitako teknologiaren aurreko aplikazioei dagokienez, nabarmen ezberdina eta berritzailea den zatia izan ezik, garapen-kostua ezin zaionean aplikatu salmenta-prezioari.
  - e) Enpresa nazioartekotzeko proiektuak.
  - f) Bizkaiko Lurralde Historikoko zentroetan aplikatu ezin diren proiektuak.
  - g) Kalitate kontrolari lotutako proiektuak, eta produktuak egokitzea merkatuak edo aplikatu beharreko arauak ezarritako berariazko betekizunetara.
  - h) «Funtsezko ikerketa» edo «Industria ikerketa» egiteko proiektuak, Itunaren 107. eta 108. artikulua aplikatzearen ondorioz (2014ko ekainaren 26ko AOL 187), zenbait laguntza-kategoria barruko merkatuarekin bateragarritzat jotzen dituen 2014ko ekainaren 17ko 651/2014/EE Batzordearen Erregelamenduan jasotako definizioarekin bat etorrita (aurrerantzean, 651/2014 (EB) Erregelamendua).
  - i) Plangintzarako pakete informatikoak (ERP, CRM, GMAO, etab. gisakoak) garatzeko proiektuak.
  - j) Plan estrategikoak, merkataritza-planak edo antzekoak eta haien berrikuspenak idazteko aholkularitza.
  - k) Produktuaren bizi-zikloari buruzko azterketak.
  - l) Edozein ziurtagiri lortzeko ekintzak.
  - m) Azoketara joatea, katalogoak, web orriak eta merkatuaren azterketak.
  - n) Kudeaketa-sistemen ezarpena.
  - o) Defentsa legalak, eta beste erakunde fisiko edo juridiko batzuek patentearen eskabideari, erabilgarritasun ereduari edo diseinuari aurkeztutako alegazioen erantzunak edo aurkakotasunak.
  - p) Definizioan (argitasuna, plangintza, egikaritzeko metodologia...) edo proiektuari esleitutako baliabideetan (baliabide teknikoak, giza taldea, zuzkidura ekonomiko...) gabezia argiak dauzkaten proiektuak.
  - q) Bizkaiko Foru Aldundiaren Ekonomi eta Lurralde Garapena Sustatzeko Sailaren bestelako programa edo jarduketa arloen barruan sar daitezkeen jarduerak.
  - r) Ekonomi eta Lurralde Garapena Sustatzeko Sailaren helburuekin bat ez datozen edota Ekonomi eta Lurralde Garapena Sustatzeko Sailaren eskuduntzen eremuan sartzen ez diren jarduerak.
6. Ez dira diruz lagun daitezkeen egitatearen barruan hartuko aurkeztutako proiektuaren zati nuklearrari guztiz uztartuta ez dauden edo harekin lotura gutxi edo loturarik ez duten jarduketak.

#### **5. artikulua. — Diru-laguntza jaso dezaketen gastuak**

1. Laguntza egitarau honetan aurkeztutako proiektuen diruz laguntzeko moduko oinarria zenbategotzeko, proiektuaren aurrekontua hartuko da kontuan. Aurrekontuak kontzeptuka desglosaturik egon behar du.
2. Zehazki, honakoak izango dira diruz lagun daitezkeen gastuak:
  - a) Proiektuari zuzenean lotuta dauden kanpoko gastuak, diruz lagundu ezin diren gastutzat adierazita daudenak izan ezik.



- b) Ibilgetuko inbertsioek jasoko dituzte diru-laguntzak, Kontabilitateko Plan Orokorren kategoria hauetan:
- 206. Aplikazio informatikoak.
  - 212. Instalazio teknikoak.
  - 213 Makinak.
  - 215. Beste instalazio batzuk.
  - 217. Informazio prozesuetarako ekipoak.

Ondasuna eskuratzeko gastuak lagundu ahalko dira diruz.

Diru-laguntza jaso dezakete leasing modalitatearen bidez eskuratutako aktibo finkoetako inbertsioek, betiere kontratuan ondasuna eskuratzeko konpromisoa jasotzen bada. Kasu horietan, ondasuna eskuratzeko erabilitako zenbatekoa soilik joko da diruz lagundu daitekeen gastutzat, eta ez dira inola ere onartuko finantza-errentamenduaren kontratuko baldintzak direla-bide aplikatzen diren finantza-gastuak eta komisioak.

Inbertsioetarako diru-laguntza jasotzeko, inbertsioek enpresen lehiatze-posizioa nabarmen hobetzeko balio behar dute eta teknologikoki aurreratuak izan behar dute. Horretaz gain, inbertsioen helburu diren ondasunek baldintza hauek bete behar dituzte:

- Lehenengoz erabiltzea edo abian jartzea.
  - Enpresaren aktiboan gutxienez 5 urtez jarraitzea, faktura-dataz gero zenbaitzen hasita.
  - Hirugarrenei alokatuta nahiz lagata ez egotea, kontraprestazioarekin zein kontraprestaziorik gabe.
  - Enpresa eskatzaileak berak egindakoak ez izatea.
- c) Aurkeztutako proiektuak iraun bitartean, proiektua burutzeko lanari dagozkion barneko langileria-gastuak. Kontzeptu horren barruan sartuko dira soilik soldata gordina eta gizarte kargak (Gizarte Segurantza) erakunde eskatzaileari eragiten dizkieten langilieriaren gastuak.

Pertsona bakoitzeko orduko kostua kalkulatzeko horrela egingo da:

$$\frac{\text{G.S.K.O.} \times 12 \times 1,25}{\text{Urteko ordu kopurua}}$$

*Non:*

G.S.K.O. gertaera arruntak direla-eta langileak Gizarte Segurantzari egin beharreko hileko kotizazio-oinarria da. Beste kotizazio-araubide batzuen mendeko pertsonen dago kienez, Gizarte Segurantzaren araubide orokorreko oinarriekin parekatutako oinarri bat hartuko da.

Urteko ordu kopurua langileak, lan-hitzarmenaren arabera, urtean egin beharreko ordu-kopurua da, kasu bakoitzean lanaldiaren murrizketaren portzentajea kontuan hartuta, halakorik egonez gero. Besterik adierazi ezean urteko 1.720 orduko hartuko dira.

Diruz laguntzeko oinarria kalkulatzeko, gehienez 3 pertsona hartuko dira kontuan 5 eta 49 langile bitarteko enpresen kasuan, eta 5 pertsona gehienez 50 eta 100 langile bitarteko enpresen kasuan.

Nolanahi ere, ez du gaindituko 120 orduko kopurua enpresako eta hileko 5 eta 49 langile bitarteko enpresen kasuan, ezta ere 240 orduko kopurua enpresako eta hileko, 50 eta 100 langile bitarteko enpresen kasuan, deialdi batean enpresa jakin bati lagundutako proiektu guztiak kontuan harturik.

3. Ondoko hauek ezin izango dute diru-laguntza jaso:
- a) 1.000 euro (BEZa kenduta) baino gutxiagoko gastuen frogagiriak sortzen dituzten kanpoko gastuak edo kanpoko inbertsioak. Salbuespen gisa, beste gastu batzuk onartuko dira, baldin eta haien sortzapen edo ordainketa epetan edo erlo-





tan zatitu bada, eta adierazitako zenbatekoa baino gutxiagoko justifikazio-agiriak sortzen badituzte; horretaz gain, seriean zehar trazabilitate argia egon behar da, diru-laguntza jaso dezakeen gastuaren kontzeptu berari lotutako kopurua osoa 1.000 euro edo gehiago dela egiaztatzea ahalbidetzeko.

- b) Zergak eta tasak, BEZa barne (BEZa berreskuratu ezin den kasuetan ere bai), eta jabetza industrialaren babesteko prozesuei lotutako tasak kanpo utzita.
- c) Zeharkako gastuak.
- d) Gastu orokor osagarriak, adibidez administrazio gastuak, dietak, kontsumo orokorrak (energia, ura, mezulariak, posta, garbiketara, telefonia, segurtasuna, bulego materiala...).
- e) Bidaien, otorduen eta mantenuaren gastuak.
- f) Aktibo finkoak alokatzeko gastuak.
- g) Garraio elementuak.
- h) Lokalen pintaketa, alikatatua eta egokitzapena.
- i) Plangintzako informatikako paketeak (ERP, CRM, GMAD... motakoak).
- j) Edozein kudeaketa-sistema ezartzeko gastuak.
- k) Defentsa legalak, eta beste erakunde fisiko edo juridiko batzuek patentearen eskabideari, erabilgarritasun ereduari edo diseinuari aurkeztutako alegazioen erantzunak edo aurkakotasunak sortutako gastuak.
- l) Jabetza industrialaren bulegoetako urteko ordainketak.
- m) Beste finantza-gastu batzuk, besteak beste, komisioak edo kapital sozialari egingandako ekarpenak, diruz lagun daitezkeen gastutzat jasotzen ez direnak.
- n) Ekonomi eta Lurralde Garapena Sustatzeko Sailaren beste laguntza-programa batzuetan diruz lagun daitezkeen beste gastu guztiak.

4. Dena dela, dekretu honen 25. artikuluan ezarritakoa beteko da. Artikulu horretan diru-laguntza jaso dezaketen gastuetarako irizpide orokorrak adierazten dira.

5. Diruz lagun daitezkeen gastuaren balorazioa euroa ez den beste txanpon bat erabiliz egingez gero, fakturaren datan egingo da eurorako trukea.

6. 15.000 euro edo gehiagoko (BEZik gabe) kanpoko gastuak eta inbertsioak kasu honetan baino ez dira diruz lagun daitezkeen gastutzat joko: laguntza eskatzeko dokumentazioarekin batera gastu horri ezarritako zenbatekoa justifikatzen duen eskaintza, kontratua edo faktura aurkezten bada.

7. Dekretu honen 7. artikuluan ezarritako burutzeko epearen barruan (2018ko urtarilaren 1aren eta 2020ko ekainaren 30aren bitartean) sortutako eta fakturatutako gastuak lagundu ahalko dira diruz, beti ere dekretu honen 12. artikuluan ezarritako justifikatzeko azken eguna (2020ko uztailaren 31) baino lehen ordaintzen badira.

## **6. artikulua. — Laguntzen zenbatekoa**

1. Kapitulu honetan ezarritako onurak ezarritako egitate eta diruz lagun daitezkeen gastuengatik itzuli behar ez diren diru-laguntzak dira, enpresa onuradunaren kontabilitatearen ondorioetarako.

Berrikuntza-proiektuak garatzeko diru-laguntza kalkulatzeko, proiektua gauzatzeko gastuak sartuko dira (kanpoko gastuak, inbertsioak eta langileen barruko gastuak).

Diru-laguntzaren zenbatekoa kalkulatu da ondoko portzentaje hauek diruz lagun daitezkeen gastuei aplikatuz, kostu motaren arabera:



Kategoria / Categoría	Laguntzaren gehieneko % % máximo de ayuda	
	35-60 puntu/puntos	61-110 puntu/puntos
Berrikuntzari buruzko aholkularitza eta laguntza emateko zerbitzuei eta bideragarritasun-azterlanei lotutako kanpoko gastuak. Gastos externos vinculados a servicios de asesoramiento y apoyo en materia de innovación y estudios de viabilidad.	60	70
Kanpoko gastuak batzuk / Otros gastos externos	20	30
Aktibo finkoetako inbertsioa / Inversión en inmovilizado	5	12
Barneko langileria-gastuak / Gastos internos de personal	20	30

2. Berrikuntzari eta bideragarritasun-azterlanei buruzko aholkularitza eta laguntza emateko zerbitzuei lotutako kanpoko gastutzat joko dira Itunaren 107. eta 108. artikulua aplikatzearen ondorioz 651/2014 (EB) Erregelamenduan hala definitzen direnak.

- Berrikuntzaren arloko aholkularitza-zerbitzuak: Aholkularitza, laguntza eta presakuntza arlo hauetan: ezagutzaren transferentzia; aktibo ez-materialen eskuraketa, babesa eta ustiapena; eta horiek jasotzen dituzten arau eta erregelamenduen erabilera.
- «Bideragarritasun-azterlana»: proiektu baten potentziala ebaluatu eta aztertzea, erabakiak hartzeko prozesua objektiboki eta zentzuz laguntzeko, haren puntu ahulak eta indartsuak eta aukerak eta mehatxuak aurkituz, eta hura burutzeko beharrezko baliabideak eta, azken batean, haren arrakastarako aukerak zehazteko.

3. Organo instrukzio-egileak zehaztuko du enpresak diru-laguntza eskaeran aurkeztutako kanpoko gastuetako zein hartuko diren berrikuntzari eta bideragarritasun-azterlanei buruzko aholkularitza eta laguntza emateko zerbitzuei lotutako kanpoko gastutzat.

4. Gutxienez 35 puntu lortzen ez dituzten proiektuak ezetsi egingo dira, laguntza ekonomikoa jasotzeko gutxienezko puntuaziora ez heltzeagatik

5. Proiektua gauzatzeko gastuei dagokien laguntza ebazpena ematen denean emango da.

6. Erakunde eskatzaile bakoitzeko, lagundutako proiektu bakoitzean 100.000 euro emango dira gehienez, eta, kopuru horretatik, 25.000 euro barruko pertsonal-gastuetan laguntzeko izango dira.

7. Ez da 6.000 eurotik beherako diru-laguntzarik emango. Muga hori ez da aplikatuko laguntzaren azken zenbatekoa dekretu honen 27. eta 28. artikuluetan ezarritako laguntzen metaketa eta bateragarritasun irizpideen ondorioz egindako murrizketa baten emaitza bada, edo erabilgarri dagoen kreditua agortu delako egin den murrizketa baten ondorio bada.

8. Jarduketa burutzeko unea zein ere den, laguntza aurrekontuko ekitaldi bati edo hainbati esleitu ahalko zaie.

### **7. artikulua. – Burutzeko epeak**

Kapitulu honen babesean garatzen diren proiektuak 2018ko urtarrilaren 1etik eta 2020ko ekainaren 30era hasi eta amaitu beharko dira.

Salbuespen gisa eta 44.4 artikuluan jasotako baldintzetan, enpresa onuradunak proiektua egiteko eta/edo justifikatzeko epea luzatzeko eskatu ahal izango du. Luzatzeko eskaera 2020ko ekainaren 1a baino lehen egin eta ebatzi beharko da.

Luzapena onesten bada, ebazpen espresu bat emango da, non proiektua egiteko eta/edo justifikatzeko epe berriak adieraziko diren. Epe horiek ez dira izango sei hilabetetik gorakoak, 7. eta 12.3 artikuluetan, hurrenez hurren, proiektua egiteko eta justifikatzeko ezarritako azken egunetatik zenbatuta. Ebazpen espresurik ematen ez bada, administrazio-isiltasunak ezespren-balioa izango du.



**8. artikulua. — Eskabideak aurkezteko epea**

Eskabideak aurkezteko epea 2019ko martxoaren 25an hasiko da, eta 2019ko apirilaren 12ko 13:30ean amaituko da.

**9. artikulua. — Gehienez aurkez daitezkeen eskabideak**

Erakunde bakoitzak, eskabide bi (2) aurkeztu ahal izango ditu, gehienez.

Enpresa bateko enpresa-kopuruak mugak gainditzen baditu, organo instruktoreak jasotako lehenengo eskabideak baino ez ditu ebaluatuko, eta gainerako eskabideak automatikoki ezetsiko ditu.

**10. artikulua. — Emateko prozedura**

Diru-laguntzak norgehiagokako araubidearen arabera esleituko dira, hautaketa-prozedura bakarren bidez, urte horretan diru-laguntza egitarau honentzat deialdi bat baino gehiago onartzeko aukeraren kaltetan jo gabe.

Foru dekretu honen ondorioetarako, hauxe hartzen da norgehiagokatzat: diru-laguntzak emateko prozesu honetan aurkeztutako eskabideak alderatu egiten dira, arlo eta atal bakoitzean ezarri diren balorazio-irizpideekin bat etorritik haien artean hurrenkera bat ezartzeko. Horrela, deialdi honen barruan eskura daitezkeen kreditua muga moduan ezarrita, baloraziorik handiena lortu duten eskabideek jasoko dute diru-laguntza.

**11. artikulua. — Balorazio irizpideak**

1. Onuradun izateko baldintzak betetzen dituztela frogatzen duten enpresetatik, baloraziorik onena lortzen dutenek jasoko dituzte diru-laguntzak, aurrekontuan baliagarri dagoen mugaren barruan, honako irizpide hauen arabera eta adierazitako ponderazio edo haztapienak eginez. Irizpide bakoitzean ebaluaziorako aintzat hartuko diren alderdiak adierazten dira.

**1. irizpidea. — Proiektuaren garrantzia enpresarentzat (30 puntu)**

- 1.a) Eragina enpresaren negozio ereduaren elementu zentraletan (20 puntu).
- 1.b) Proiektuak ekartzen duen apustu maila enpresarentzat (10 puntu).

**2. irizpidea. — Proiektuaren eragina (15 puntu)**

- 2.a) Proiektuak enpresaren hazkundean izan dezakeen eragina (10 puntu).
- 2.b) Proiektuak Bizkaian izan dezakeen trakzio-efektua (5 puntu).

**3. irizpidea. — Proiektuaren berrikuntza maila (40 puntu)**

- 3.a) Enpresarentzako berrikuntza-maila (15 puntu).
- 3.b) Sektorearentzako berrikuntza-maila (15 puntu).
- 3.c) Proiektua Euskadiko espezializazio adimenduneko RIS3 sektoreei lotuta dago (10 puntu).

**4. irizpidea. — Proiektuaren definizioa eta aurkeztutako proposamenaren kalitatea (10 puntu)**

- 4.a) Proiektuaren bideragarritasuna (5 puntu).
- 4.b) Proiektuaren plangintza, helburuak, adierazleak eta jarraipen-sistematika (5 puntu).

**5. irizpidea. — Konpromiso soziala eta iraunkortasuna (5 puntu)**

Irizpidea honetan, kontuan hartuko da enpresak ziurtagiriak eta /edo planak izatea arlo hauetan: ingurumenaren iraunkortasuna, genero-berdintasuna, euskararen sustapena eta erantzukizun sozial korporatiboa.

**6. irizpidea. — Enpresak berrikuntzara hurbiltzeko sustapena**

Enpresak ez du diru-laguntzarik jaso 2014-2018 bitarteko deialdietan laguntza programa hauetan: 3i, 2i, Berrikuntza sustatzeko plana, Afipyme, Bizkaia Digitala, IN-Txiki (Txekeoak eta Proiektuak) eta Txekeo Teknologikoak (10 puntu).

2. Irizpide horiek erabiliz organo instruktoreak ebaluazioa egingo du eta azken balorazioa dakarren ondorioen txostena egingo du; hortik aterako da aurkeztutako proiektuen sailkapena.

3. Gutxienez 35 puntu lortu dituzten eskabideek bakarrik lor lezakete diru-laguntza.

**12. artikulua. — Aurkeztu beharreko agiriak**

1. Laguntza egitarau honen onurei heldu nahi dieten enpresek artikulua honetan jasotako agiriak bidali behar dizkiote Ekonomi eta Lurralde Garapena Sustatzeko Sailari:

2. Eskabidearekin batera aurkeztu beharreko agiriak:

- a) Eskabide telematikoa, dekretu honen 31. artikuluan ezarritakoaren arabera.
- b) Ekonomi eta Lurralde Garapena Sustatzeko Sailaren web gunean eta bulegoetan eskura daitekeen ereduaren arabeko eskabidea, behar bezala beteta eta ordezkatzeko ahalorde nahikoa duten pertsonen sinatuta.
- c) Eskuragarri dagoen Langile Izendun Zerrenda RNT (aitzineko TC2a) berriena. Enpresari lotutako langile autonomoak badaude, pertsona bakoitzaren azken banku-ordainagiria ere (autonomoen buletina) erantsiko du, bai eta kotizazio-oinarrien azken txostena ere (eskuragarri dagoen azken hileko kotizazioa barne).
- d) 15.000 euro edo gehiagoko (BEZik gabe) kanpoko gastuen eta inbertsioen kasuan, esleitutako kopuruak justifikatzen dituzten eskaintza, kontratu edo fakturen kopia.
- e) Eskaera egiteko unean eginda dauden kanpoko gastu eta inbertsio guztietarako fakturak eta horien banku ordainketen frogagiriak. Ez da onartuko eskura ordaintzea. Leasing kasuetan, finantza errentamenduaren kontratuaren kopia, hornitzaileak finantza erakundeari egindako fakturaren kopia eta erosteko azken aukera hondar-balioarekin burutzeko konpromisoaren agiria (baina ez da aurkeztu beharrik izango finantza errentamenduaren kontratuan islatzen bada).
- f) Indarrean dauden ziurtapenak eta/edo planak, genero ikuspegi, ingurumen, euskararen sustapen eta enpresa erantzukizun sozialekoak, bai eta erakunde publiko eskudunek emandako aintzatespenak eta diplomak ere.
- g) Hartzekodunaren fitxa, Bizkaiko Foru Aldundian banku-helbideratzeari buruzko datuak ez badaude edo dauden datuak aldatu nahi badira. Dokumentazio osoa dagoela jotzen den data zehazterakoan ez da kontuan hartuko hartzekodunaren fitxa, espedientearen ebazpena emateko ondorioetarako.

Proiektua baloratzeko ondokoak hartuko dira kontuan jasotako agiriak eta proiektuan parte hartuko duten enpresako pertsonekin egindako elkarrikuskaketan bildutako informazioa.

3. Proiektua egiten ari den bitartean eta amaitutakoan aurkeztu beharreko agiriak, eta diru-laguntza egiaztatzeko eta espedientearen itxeko. Justifikazioa aurkezteko azken eguna 2020ko uztailaren 31 izango da, luzapena beren-beregiko ebazpen baten bidez eman ezean. Egiaztapen-kontuaren sistemaren bidez egin beharko da diru-laguntzaren justifikazioa eta horretarako agiri hauek aurkeztu beharko dira:

- a) Justifikazioaren txostena, webean eta Ekonomi eta Lurralde Garapena Sustatzeko Saileko bulegoetan eskuragarri dauden ereduaren arabera, behar bezala bete eta proiektua garatzen duen entitateko nahikoa ahalmen duen pertsonak izenpetua.

Txosten horretan diruz lagundutako proiektuari egotzitako sarrera-gastuen egoera-orria aurkeztuko da, baita jardueraren gastuen zerrenda bat ere, sailkatuta. Gastu bakoitzean, hartzekoduna, zenbatekoa, jaulkipen-data eta ordainketa data ere identifikatu behar dira.



Txotenean diruz lagundutako jarduera finantzatu duten beste diru-laguntza, laguntza, sarrera edo baliabide batzuen zerrenda xehakaturia ere aurkeztuko da, baita eskatzen den finantzaketa propioarena ere, hala badagokio.

Ereduak berdinak izango dira tarteko justifikazioetarako zein azken justifikazioetarako.

- b) Eskuragarri dagoen Langile Izendun Zerrenda RNT (aitzineko TC2a) berriena. Enpresari lotutako langile autonomoak badaude, pertsona bakoitzaren azken banku-ordainagiria ere (autonomoen buletina) erantsiko du, bai eta kotizazio-oinarrien azken txostena ere (eskuragarri dagoen azken hileko kotizazioa barne).
- c) Legezko baldintzak betetzen dituzten gastuen fakturak. Beste herri batzuetako fakturekin batera itzulpena aurkeztu beharko da, ingelesez eginda daudenak izan ezik. Leasing kasuetan, finantza errentamenduaren kontratuaren kopia, hornitzaileak finantza erakundeari egindako fakturaren kopia eta erosteko azken aukera hondar-balioarekin burutzeko konpromisoaren agiria (baina ez da aurkeztu beharrik izango finantza errentamenduaren kontratua islatzen bada).
- d) Fakturen ordainketen frogagiriak. Ez da onartuko eskura ordaintzea.
- e) Dekretu honen 43. artikuluan eskatzen diren hiru eskaintzak edo ordezkoko agiriak.
- f) Diru-laguntza emateko ebazpenean beren-beregi aurkezteko eskatu dena.

Ez dira onartuko 1.000 eurotik beherako gastuak (BEZa sartu gabe) justifikatzeko agiriak.

4. Diru-laguntzen onuradun diren erakundeek, diru-laguntzaren azken justifikazioaz gainera, bitarteko justifikazio bakarra aurkeztu dezakete, 2020ko martxoaren 31 baino lehen (egun hori barne).

5. Proiektua justifikatzeko unean, 6. Artikuluan agertzen diren kostu-kategorien batean onargarria den zenbateko osoa diru-laguntza kalkulatzeko onartu zen zenbatekoa baino txikiagoa dela ikusten bada, beste kategoriatan dagoen %20raino goranzko desbideratzeen bidez konpentsatu ahal izango da, beti ere 6. artikuluan ezartzen den langileria-gastuetarako gehienezko diru-laguntza gainditzan ez bada. Kostu-kategoria bakoitzari dagozkion laguntza-portzentajeen arabera kalkulaturako diru-laguntzatik justifikatu beharreko zenbatekoari dagokionez, guztira emandako diru-laguntzaren zenbatekoa edo gehiago justifikatu behar da. Bestela, ez-betetzearen ondoriozko prozedura hasiko da.

6. Dena dela, Ekonomi eta Lurralde Garapena Sustatzeko Sailak enpresa eskatzaileari beharrezkotzat jotzen dituen agiri edota informazio osagarriak eskatu ahal izango dizkio, aurkeztutako eskabidea ondo ulertu eta ebaluatzeko eta beraren jarraipena egin ahal izateko. Era berean, Ekonomi eta Lurralde Garapena Sustatzeko Sailak erakunde eskatzaileari bisitak eskatu ahal izango dizkio proiektua egin bitartean eta amaitu ondoren, jarraipen egokia egiteko.

### **13. artikulua. — Erakunde laguntzaileak**

Ekonomi eta Lurralde Garapena Sustatzeko Sailak berari atxikitako foru sozietate publiko batzuen laguntza du bere helburuak lortzeko. Beaz, S.A.U., da sozietate horietako bat. Sozietate horrek diru-laguntza egitarauan esku hartuko du, erakunde laguntzaile gisa, Bizkaiko Foru Aldundiarekin sinatutako lankidetzaren hitzarmenean ezarritakoaren arabera.

Beaz, S.A.U., erakunde laguntzaileak Bizkaiko Foru Aldundiko Ekonomi eta Lurralde Garapena Sustatzeko Sailaren izenean eta kontura jardungo du; sail hori izango da, ondorio guztietarako, foru dekretu honetan ezarritako laguntzen emaila.

### **14. artikulua. — Diru-laguntza ordaintzea**

Beaz, S.A.U., sozietatearen bitartez emango dira diru-laguntzak. Ordainketak proiektuaren gauzatze-mailaren arabera egingo dira proiektuaren justifikazio partzialak edo justifikazio osoa jaso ondoren; nolana ere, 2020ko uztailaren 31 baino lehen justifikatu



behar da, luzapena beren-beregiko ebazpen baten bidez eman ezean. Gehienez bi (2) ordainketa egingo dira.

Diru-laguntzaren azken justifikazioari dagokionez, emandako diru-laguntzak aurretiaz ordainduko dira, erakunde onuradunei bermerik eskatu gabe.

Erakunde onuradunei egiten zaizkien ordainketak diruz lagun daitezkeen gastutzat jotzen diren justifikatutako gastuen proportzionalak izango dira, urteko bakoitzean ematen diren kopuruak gorabehera. Kopuru hori aldi bakoitzean eman dena baino txikiagoa izan daiteke, eta, hala badagokio, egindako gastuaren proportzionala den diru-laguntzaren azken doikuntza egin behar da.

Beaz, S.A.U., erakunde onuradunari ordainketa egiteko, lankidetzaren proiektuen kasuan egunean beteta izan behar ditu zerga-betebeharrak eta Gizarte Segurantzarekikoak. Hala ez bada, diru-laguntza itzultzeko eskatuko da, edo diru-laguntza kobratzeko eskubidea galdutzat joko da, 5/2005 Foru Arauaren 38. artikuluan ezarritako prozeduraren arabera.

## II. KAPITULUA

### BERRIKUNTZA PROIEKTUREN FINANTZATZE KOSTUENTZAKO DIRU LAGUNTZAK

#### 15. artikulua.— *Helburuak*

Laguntzen programa honen asmoa Bizkaiko enpresen berrikuntzako proiektuentzako finantzazioa eskuragarriago jartzea da.

Xede horrekin erakunde onuradunei diru-laguntzak eskaintzen dizkie «EELIF Berrikuntza Funtsak» emandako maileguen finantza gastuetarako.

#### 16. artikulua.— *Entitate onuradunak*

1. Kapitulu honetan araututako diru-laguntzak eskuratu ahal izango dituzte dekretu honen I. Kapituluak arautzen duen laguntza egitarauaren babespean diru laguntza esleitu zaien enpresak.

2. Gainera, erakunde onuradunak honako baldintza hauek bete beharko dituzte:

- a) Zerga betebeharrak, Gizarte Segurantzarekikoak eta diru-laguntzak itzultzearen ondoriozkoak eguneratuta edukitzea.
- b) Berdintasunerako eskubidea eta sexu-diskriminaziorik eza urratzeagatik zehapen irmorik ez izatea administrazio-bidean, edo lan-arloan edo zigor-arloan, eta ez izatea berdintasun-printzipioaren kontrakoak, enpresen helburuetan, onartze-sisteman, funtzionamenduan, ibilbidean edo jardueran sexua dela-eta edo beste edozein egoera zein inguruabar dela-eta diskriminaziorik egiten ez delako.
- c) Ez dagoela Diru-laguntzei buruzko 5/2005 Foru Arauaren 12. artikuluan azaltzen diren inguruabarretako batean ere.

a), b) eta c) baldintzak automatikoki bete beharko dira, eta kasuan kasuko inguruabarrak gertatzen diren bitartean iraungo dute, 5/2005 Foru Arauaren 12. artikuluan ezarritakoaren arabera.

3. Diru-laguntzaren bat jasotzen duten erakunde onuradunek 5/2005 Foru Arauaren 13. eta 41. artikuluetan xedatutakoa bete beharko dute. Bereziki, jasotako fondoak zertan erabili diren frogatzen duten agiri guztiak gorde beharko dituzte, agiri elektronikoak barne, finantza-kontrolaren eginkizunak dituzten organoen egiaztapen-jardueren eta kontrol-jardueren xede izan baitaitezke, eta haiei lankidetzaren eskaini beharko diete.

#### 17. artikulua.— *Diruz lagun daitezkeen egitatea*

Diruz lagundu ahal diren egitateak «EELIF Berrikuntza Funtsak» ematen dituen maileguak izango dira, dekretu honen I. Kapituluaren ezarritakoaren arabera diru laguntza jaso duten proiektuentzat.

Jakinarazten da EELIF Berrikuntza Funtsaren maileguak ematea edo ukatzea El-kargi SGR erakundeari eta Solventis SGIIC-ri dagokiela, lehenengoa erakunde mer-



katuratzailea baita, eta, bigarrena, funtsa kudeatzen duen erakundea. Era berean, funtsari buruzko informazio-liburuxkan jasotakoaren arabera, maileguak berrikuntza teknologikoko proiektuek bakarrik jaso ditzakete beren izaera berritzaileari buruzko Beaz, SAUren aldeko txostena jasotzen duten. Baliteke maileguaren zenbatekoa (nominala) eta hartan jasotzen diren gastuen aurrekontua ez izatea 2018ko 2i programan aurkeztutako eta —zenbait kasutan—, diruz lagundutako berbera.

**18. artikulua. — Diru-laguntza jaso dezaketen gastuak**

1. Diruz lagun daitezkeen gastuak «EELIF Berrikuntza Funtsak», IFZ V-95920310 duenak, emandako maileguei dagozkien finantza gastuak izango dira, maileguak 2020ko martxoaren 31 baino lehenago izenpetu badira.

2. Diruz lagundu daitezkeen gehienezko finantza-gastuen zenbatekoa muga hauek kontuan hartuta kalkulatu da:

- a) Maileguaren zenbateko nominala ezin da izan dekretu honen I. Kapituluaren ezarritakoaren arabera diru laguntza jaso duten proiektuaren diru-laguntzaren oinarria baino handiagoa; eta gehienez, 600.000 euro.
- b) Interes-tasa ezin da izan %2,1 finkoa baino handiagoa.
- c) Maileguaren epea 5 urterakoa izango da, gehienez, urte 1eko gabealdiarekin.
- d) Bigarren urtetik bosgarrenera, amortizazioa lineala izango da.
- e) Komisiorik gabe.

3. Diru-laguntza ematen den egunean eguneratutako balioa izango da zenbatekoa.

4. Diruz-lagungarriak izango dira maileguaren iraunaldiaren osoan sortatutako finantza gastuak.

**19. artikulua. — Laguntzen zenbatekoa**

Kapitulu honetan ezarritako onurak ezarritako egitate eta diruz lagun daitezkeen gastuengatik itzuli behar ez diren diru-laguntzak dira, enpresa onuradunaren kontabilitatearen ondorioetarako.

Diru-laguntzaren zenbatekoa diruz lagun daitezkeen gastuen %100 izango da.

Jarduketa burutzeko unea zein ere den, laguntza aurrekontuko ekitaldi bati edo hainbati esleitu ahalko zaie.

**20. artikulua. — Burutzeko epeak**

Kapitulu honen babesean diruz laguntzen diren maileguak 2020ko martxoaren 31 baino lehenago izenpetu beharko dira eta haien gehienezko iraunaldia 5 urtekoa izango da izenpetze egunetik aurrera.

**21. artikulua. — Eskabideak aurkezteko epea**

EELIF Berrikuntza Funtsaren maileguen finantza-gastuetarako jasotzen den diru-laguntza ofizioz izapidetuko da, sinatzen den mailegu bakoitzari buruzko informazioa jasotzen denean, Elkargi SGR erakundearekin sinatutako lankidetzatza-hitzarmenean xedatutakoarekin bat. Jakinarazpena 2020ko ekainaren baino lehenago egin beharko da.

**22. artikulua. — Emateko prozedura**

5/2005 Foru Arauaren 20. artikuluan xedatutako norgehiagokarik gabeko araubidean emango dira kapitulu honetan araututako diru-laguntzak.

Eman nahi diren diru-laguntzen xedeak berak justifikatzen duen norgehiagokarik gabeko araubideaz baliatzea laguntzok emateko. Askotariko egoerak gerta daitezke eskatzaileen artean, eta horrek zaildu egiten du ebaluazio-irizpide objektibo eta homogeneoak finkatzea aurkeztzen diren eskabideen artean lehentasunak ezartzeko.

Dekretu honen ondorioetarako, hau jotzen da norgehiagokarik gabeko prozeduratzat: eskariak jaso ahala banatzea diru-funtsak. Hala, bada, eskabideek mailegu kontratua izenpetze dataren arabera ezarritako da eskarien arteko lehentasuna, eta, deialdian



ezarritako betekizunak betetzen badituzte, aurrekontuko hornidurek ahalbidetzen duten bitartean emango dira laguntzak.

**23. artikulua.— Aurkeztu beharreko agiriak**

1. Diru laguntza eskatzeko eta justifikatzeko agiri guztiak Elkargi EEEK aurkeztuko du, helburu horretarako sinatu den lankidetzaz hitzarmenean xedatutakoarekin bat. Horren arabera, Elkargi EEEK Bizkaiko Foru Aldundiari honako hau jakinaraziko dio:

- a) 2i egitarauko enpresa onuradunek «EELIF Berrikuntza Funtsa»rekin izenpeturiko mailegu bakoitza, ezaugarriak barne (printzipala, amortizatzeko era...).
- b) Sei hilean behin jakinaraztea «EELIF Berrikuntza Funtsa»rekin izenpetu den eta finantza-gastuetarako diru-laguntza duen mailegu bakoitzaren amortizazio-taula eguneratua, enpresek ordaindutako diru-kopuruak eta xteko aurreikuspena barne.

2. Dena dela, Ekonomi eta Lurralde Garapena Sustatzeko Sailak enpresa eskatzaileari beharrezkotzat jotzen dituen agiri edota informazio osagarriak eskatu ahal izango dizkio, aurkeztutako eskabidea ondo ulertu eta ebaluatzeko eta beraren jarraipena egin ahal izateko. Era berean, Ekonomi eta Lurralde Garapena Sustatzeko Sailak erakunde eskatzaileari bisitak eskatu ahal izango dizkio proiektua egin bitartean eta amaitu ondoren, jarraipen egokia egiteko.

**24. artikulua.— Diru-laguntza ordaintzea**

EELIF Berrikuntza Funtsaren maileguetarako finantza-gastuei dagozkien diru-laguntzak Elkargi EEEri emango zaizkio zuzenean, sinatutako maileguei buruzko informazioa jaso ondoren. Hark ez dizkio jasanaraziko gastuok erakunde onuradunari, Bizkaiko Foru Aldundiaren Gobernu Kontseiluak 2019ko otsailaren 26ko erabaki bat dela bide sinatutako hitzarmenean xedatutakoarekin bat.

Elkargi EEEri ordainketa egiteko, onuradunak egunean beteta izan behar ditu zerga-betebeharrak eta Gizarte Segurantzarekikoak. Hala ez bada, diru-laguntza itzultzeko eskatuko da, edo diru-laguntza kobratzeko eskubidea galdutzat joko da, 5/2005 Foru Arauaren 38. artikuluan ezarritako prozeduraren arabera.

**II. TITULUA****DIRU-LAGUNTZENTZAKO XEDAPEN KOMUNAK****25. artikulua.— Diru-laguntza jaso dezaketen gastuetarako irizpide orokorrak**

1. Honako hauek dira diru-laguntza jaso dezaketen gastuak: indarrean dagoen araudiaren arabera behar bezala justifikatu direnak, betiere epearen barruan egin badira, beharrezkoak badira eta proiektuaren edo jardueraren izaerari eta garapen normalari erantzuten badiete.

2. Diru-laguntza jaso dezaketen gastuen kostuak ez dira onartuko baldin eta merkatuan duten balioa baino handiagoak badira.

3. Edonola ere, honako gastu hauek ez dute diru-laguntzarik jasoko:

- a) Diru-laguntzaren xedea den jarduerarekin inolako inola ere identifikatu ezin diren gastuak edo/eta deialdi bakoitzerako epearen barruan egiten ez direnak.
- b) Eskatzailearen eta hornitzailearen artean lotura dagoela erakusten duten gastuak. Ondorio horietarako, joko da lotura dagoela Sozietateen Gaineko Zergari buruzko abenduaren 5eko 11/2013 Foru Arauaren 42.3 artikulua eta Merkataritzako Kodearen 42-49 artikuluek ezarritako kasuetan.

4. 5/2005 Foru Arauaren 29.4 artikuluan ezarritakoarekin bat etorritik, ondasun inbentariagarriak erosteko, eraikitzeko, zaharbertzeko edo hobetzeko kasuetan, pertsona onuradunak ondasunak diru-laguntzaren xede zehatza betetzeko bideratzeko epea hamar (10) urtekoa izango da, erregistro publikoan inskribatu daitezkeen ondasunen kasuan, eta bost (5) urtekoa, gainerako ondasunen kasuan. Erregistro publikoan inskribatu daitezkeen





ondasunen kasuan, egoera hori aipatu egin beharko da eskrituran, bai eta emandako diru-laguntzaren zenbatekoa ere, dagokion erregistro publikoan erregistratu ere.

**26. artikulua.— *Gastuen egokitzapena***

Ekonomi eta Lurralde Garapena Sustatzeko Sailak uste badu gastuen aurrekontua anzeko gastuen batez besteko kostuarekin alderatu eta gehiegizkoa dela, diru-laguntzaren oinarria murriztu ahal izango du, gastuentzako zenbateko egoki eta proportzionalera arte.

**27. artikulua.— *Diru-laguntza metaketa***

Foru dekretu honetan jasotako laguntzek edo diru-laguntzek Batzordearen 2013ko abenduaren 18ko 1407/2013 (EB) Erregelamenduan xedatutakoa bete beharko dute. Araudi hori 2013ko abenduaren 24ko Europako Erkidegoen Aldizkari Ofizialean argitaratu zen, 352. Zenbakikoan, eta EE Itunaren 107. eta 108. artikulua minimis laguntzei aplikatzeari buruzkoa da. Horren ondorioz, arautegi hori ez betetzeak, erantzukizun penala, zibila eta administratiboa ekar liezaioke enpresa arau-hausleari. Europar Batasunak ezarritakoaren arabera, edozein enpresari emandako minimis laguntza, guztira, ez da 200.000 euro baino handiagoa izango hiru zerga-ekitalditan.

EELIF Berrikuntza Funtsaren maileguetarako finantza-gastuei dagozkien diru-laguntzak jaso dituzten enpresen kasuan, maileguaren printzipalaren %10a MINIMIS laguntza gisa zenbatuko da, erakunde publikoek berfidantzatutako Elkargiren abala bait dauka.

**28. artikulua.— *Diru-laguntzen bateragarritasuna***

Dekretu honen itzalpean ematen diren laguntzak bateragarriak izango dira beste erakunde publiko edo pribatu batzuek kontzeptu beragatik ematen dituztenekin. Halere, 5/2005 Foru Arauaren 18.3 artikuluan ezarritakoaren arabera, emandako diru-laguntzaren zenbatekoa inola ere ezin da izan, bera bakarrik edo beste batzuei batuta, diruz lagundutako jardueraren kostua baino handiagoa.

Bizkaiko Foru Aldundiko Ekonomi eta Lurralde Garapena Sustatzeko Sailaren beste plan, programa edo jarduera-arlo batek diruz lagundutako gastuek ezin izango dute diru-laguntza jaso.

Nolanahi ere, diru-laguntzak jasotzen dituzten erakundeek Ekonomi eta Lurralde Garapena Sustatzeko Sailari era frogagarrian jakinarazi beharko diote beste diru-laguntzarik jaso duten, egun batean edo bestean eman. Hala balego, horrekin batera egin den diru itzulketako gutunaren kopia bidaliko da. Horrek guztiak hala behar du, 5/2005 Foru Arauaren 18.3 eta 4. artikuluetan aurreikusitako ondorioetarako. Horrela, beraz, beste diru-laguntzen edo laguntza ekonomikoen zenbatekoak zenbatetsi eta, proiektua finantzatzeko ehunekoa mantentze aldera, diru-laguntza esleitzeko ebazpena aldatu ahal izango da. Jakinarazpen hau jakin eta berehala egin beharko da eta, edozein kasutan, jasotako funtsen erabilera justifikatu baino lehen.

Ekonomi eta Lurralde Garapena Sustatzeko Saila beste finantzatzaileekin harremanetan jarri ahalko da baterako finantzaketa adosteko.

**29. artikulua.— *Laguntzaren publizitatea***

Dekretu honen itzalpean emandako laguntzen onura jasotzen duten eskabideek jasotako laguntzari publizitatea eman beharko diote, 5/2005 Foru Aginduko 17.3 artikuluan xedatutakoaren arabera.

Proiektuaren finantziazioaren izaera publikoari buruzko publizitate egokia —euskarri informatikoetan zein bestelakoetan— egiteko, esaldi hau sartu beharko da: «Berrikuntza eta Inbertsio aurreratua Sustatzeko 2i 2019ko Planaren barruan». Beren beregi debekatuta dago beste edozein esaldi edo irudi erabiltzea Bizkaiko Foru Aldundiari erreferentzia egiteko.

**30. artikulua.— *Diru-laguntzen argitaratzea***

Diru-laguntzak ematen diren urte naturala amaitu ondorengo lehen hiruhilekoa bukatu aurretik, ebazpenaren laburpen bat argitaratuko da Bizkaiko Aldizkari Ofizialean.



Feder Eskualde Garapenerako Europako Funtsaren arautegiari jarraituz, dekretu honetako laguntzak onartzeak berekin dakar datuak zerrenda publiko batean sartuko direla onartzea: alegia, Euskal Autonomia Erkidegoko Feder 2014-2020 programa eragilearen eragiketen zerrendan.

### III. TITULUA

#### DIRU-LAGUNTZAK ESLEITZEKO PROZEDURA

##### **31. artikulua.— *Eskabideak nola aurkeztu***

Eskabidea, behar bezala eta oso-osorik beteta, Internet bidez aurkeztu behar da. Horretarako, Ekonomi eta Lurralde Garapena Sustatzeko Sailaren web orrian ([www.bizkaia.eus/sustapena](http://www.bizkaia.eus/sustapena)) bere atari birtualari dagokion atala erabili behar da.

Horrela bada, eskabideak bide telematikoa aurkeztu behar direnez, enpresa interesdunek alde aurretik sinadura elektronikoa izan beharko dute (Izenpe, NAN elektronikoa, FEA...), edo B@kQ ziurtagiri elektronikoa. Hauxe eskatu beharko dute Ekonomi eta Lurralde Garapena Sustatzeko Sailean (Orueta Apezpikua kalea, 6, Bilbo). Alta prozeduraren gaineko informazioa eskuragarri dago Ekonomi eta Lurralde Garapena Sustatzeko Sailaren web orrian.

Eskabidea aurkezteko ezinbestekoa izango da erakundea Ekonomi eta Lurralde Garapena Sustatzeko Sailaren erakundearen erregistroan alta emanda egotea (61/2010 Foru Dekretua, apirilaren 27koa. Bizkaiko Aldizkari Ofizialean 80 zenbakia, 2010.eko apirilaren 30ekoa). Egoera horretan ez badago, erakundeak inskribatzeko eskaera bete beharko du, diru-laguntza eskabidea izapidetu baino lehen.

Nolanahi ere, instrukzioaz arduratzen den organoak elkarrekin zerikusia duten eskabideak taldekatu edo banakatu ditzake, eskabideok ondo aztertu eta ebaluatzeko eta diru-laguntzaren xedeko jarduerara ondoen egokitzen den egitate lagungarria zehazteko neurri egokia dela irizten badio.

Eskatzaileak, diru-laguntzarako eskabidea aurkeztean, baimena ematen dio organo instruktoreari, onuraduna izateko baldintzen inguruabarren egiaztapena zuzenean lor dezan; hori, Diru-laguntzen Erregelamenduaren 17.1. artikuluan eta Datu Pertsonalen Babesari eta Eskubide Digitalen Bermeari buruzko abenduaren 5eko 3/2018 Lege Organikoan (aurrerantzean 3/2018 Lege Organikoan) xedatutakoarekin bat etorritik, telematikako ziurtagiri egokien bidez egin daiteke.

Eskabideekin batera 12. artikuluan ezarritako agiriak aurkeztu beharko dira; arestian aipatu bulego birtualean agiriak eransteko dagoen sistema erabiliko da.

##### **32. artikulua.— *Laguntzak emateko prozedura antolatu, aztertu eta ebatziko duten organo eskudunak***

Diru-laguntzetarako eskaerak Berrikuntza Zerbitzuak izapidetuko ditu, eta, eskaerok ebazteko, Ekonomi eta Lurralde Garapena Sustatzeko Saileko arduradunak esanbidezko ebazpena emango du, Enpresak Sustatzeko eta Ekonomia Garatzeko Zuzendaritza Nagusiak hala proposaturik.

Emakida prozedura antolatzeke, bideratzeko eta ebazteko organo eskudunak osatzerako orduan, kontuan hartu beharko da bi sexuen artean ordezkariak ordezkaturik dagoela; horrek esan nahi du bi sexuek ordezkariaren bat eduki beharko dutela, 4/2005 Legearen 20. artikuluan eta 4/2018 Foru Arauaren 44. artikuluan aurreikusitakoari jarraiki.

##### **33. artikulua.— *Txostenaren instrukzioa***

Eskabideen espedienteak honelaxe izapidetuko dira:

Instrukzioaz arduratzen den organoak ezarri diren eta pertsona edo erakunde onuradun gertatzeko ezinbestekoak diren baldintzak betetzen direla egiaztatuko du.

Eskabideak behar bezala beterik ez badaude edo deialdietan aipaturiko agiriak erantsita ez badituzte, eskabidea aurkeztu duen enpresari agindeia egingo zaio instrukzioaz arduratzen den organoak jakinarazpena egin eta biharamunetik zenbatzen hasiko den hamar (10) asteguneko epean akatsa konpon dezan edo behar diren agiriak aurkez di-



tzan; eta ohartaraziko zaio, hori egiten ez badu, eskaera bertan behera utzi duela uste izango dela berariaz emango den ebazpenaren bitartez, 39/2015 Legearen 21. eta 68. artikuluetan xedatutakoaren arabera.

Nolanahi ere, organo instruktoreak aurkeztu diren eskabideak behar bezala ulertu eta ebaluatzeko beharrezkotzat hartzen dituen agiri edota argibide guztiak eskatu ahal izango dizkie eskabidea aurkeztu duten erakunde eskatzaileei.

#### **34. artikulua.— Eskabideen ebaluazioa**

Eskabideak ebaluatuko dituen erakundeak behin betiko ebazpen proposamena egingo du. Proposamen horrek ez die inolako eskubiderik emango proposamen horretan bertan onuradun ageri diren pertsoneri edo erakundeei.

#### **35. artikulua.— Ebazpen proposamena**

Ebaluazioa egindakoan organo instruktoreak egiaztatuko du eskaera egin duen pertsonak edo erakundeak Gizarte Segurantzarekiko betebeharrak egunean dituela, baina aurretik eskabidea egin behar zaio Gizarte Segurantzaren Diruzaintza Nagusiari. Halaber, pertsona edo entitate eskatzailearen zerga egoeraren egiaztagiria eskatuko dio Ogasun eta Finantza Sailari.

Behin egiaztatuta, instrukzioaz arduratzen den organoak Enpresak Sustatzeko eta Ekonomia Garatzeko Zuzendaritza Nagusiari ebazpen proposamena igorriko dio.

#### **36. artikulua.— Aurrekontuaren muga**

Aurreko artikuluan aipatutakoarekin bat etorritz, aurkeztutako eskabide guztietatik aurrekontu-partidan aurrekontuek ahalbidetzen dituzten bezain beste hautatuko dira.

#### **37. artikulua.— Ebazteko epea**

Foru dekretu honen itzalpean aurkezten diren eskabideak ebazteko gehieneko epealdia 6 hilabetekoa izango da deialdi bakoitzeko eskaerak aurkezteko epea amaitzen denetik.

Organo eskudunak, nolanahi ere, aurkeztutako eskabide guztientzako ebazpena eman behar du nahitaez. Ebazpenerako eta jakinarazpenerako epea amaitu bada eta aipatutako organoak ebazpena eman ez badu, administrazio-isiltasunaren ondorioz eskabideari gaitz iritzi zaiola ulertuko da, horrela xedatzen 39/2015 Legearen 25. artikuluan.

#### **38. artikulua.— Ebazpena**

Enpresak Sustatzeko eta Ekonomia Garatzeko Zuzendaritza Nagusiak Ekonomi eta Lurralde Garapena Sustatzeko foru diputatuari igorriko dio ebazpen proposamena, eta hark ebaztuko du dagokion foru aginduaren bidez.

Lehia erregimenean emango diren laguntzei dagozkien ebazpenak onartutako eta ukatutako laguntzak ekarriko ditu. Horrez gain, pertsona edo erakunde onuradun izateko foru dekretu honetan ezarri diren baldintza administratiboak eta teknikoak betetzen dituzten, baina deialdiari dagokion kredituaren gehieneko zenbatekoa gainditu izanagatik onartu ezin izan diren eskabideak ere ekarriko ditu. Aurreikusitako balorazio-irizpideen arabera, eskaera bakoitzari esleitutako puntu-kopurua adieraziko da.

Diru-laguntza ematen duen ebazpenean baldintza bereziak ezarri ahalko dira, foru dekretu honetan edo dagokion deialdian xedatutakoa proiektuen izaera bereziari edo bestelako inguruabarrei egokitze aldera beharrezkoa irizten bazaio.

Ebazpena interesdunei jakinaraziko zaie, 39/2015 Legearen 40. eta hurrengo artikuluetan ezarritakoa betez.

Ebazpenaren jakinarazpena jaso ondoren, onuradun gertatu den pertsonak edo erakundeak hamar (10) laneguneko epea du –jakinarazpena jaso eta hurrengo egunetik zenbatzen hasita– baiezkota emateko. Epe hori amaitu eta interesdunek ez badute ezer adierazi, ebazpena onartu dela ulertuko da.

**39. artikulua.— Errekurtsoak**

Ebazpenak administrazio bidea agortzen du. Beraren aurka berraztertzeo errekurtsua jarri ahal izango da, Ekonomi eta Lurralde Garapena Sustatzeko Saileko titularrari ebazpena jakinarazi eta hurrengo egunetik hilabete (1) pasatu baino lehen, 39/2015 Legean ezarritakoarekin bat etorritz.

Halaber, Administrazioarekiko auzi-errekurtsua aurkeztu ahal izango da halako errekurtsoen bidezko jurisdikzioan jakinarazpena jaso eta hurrengo egunetik bi (2) hilabete pasatu baino lehen, Administrazioarekiko auzien jurisdikzioa araupetu duen uztailaren 13ko 29/1998 Legean xedatutakoarekin bat etorritz. Ezin dira bi errekurtsu horiek aldi berean jarri.

**40. artikulua.— Diru-laguntzari uko egitea**

Onuradun gertatu diren pertsonetako edo erakundeetakoren batek diru-laguntzari uko egingo balio, diru-laguntza eskaintzen duen organoak zerrendan, puntu ordenari jarraiki, hurrengo dauden pertsona edo erakunde eskatzaileei emango lieke, baldin eta eskabide horiei aurre egiteko kreditu nahikorik balego.

Diru-laguntza ematen duen organoak aukera horren berri emango die interesdunei, hamar eguneko epean diru-laguntza proposamena onets dezaten. Epe hori, gainera, ezin izango da luzatu. Diru-laguntza eskatu duen pertsona edo erakundeek proposamena onartzen dutenean, administrazio-organok laguntza emateko egintza ezarri eta jakinarazpenak egingo ditu.

Uko egitea aurkezteko gehieneko epea hamar (10) laneguneko izango da, erakunde interesdunari diru-laguntza proposamena jakinarazten zaionetik hasita. Epe hori igaro ondoren, uko egitea diru-laguntza emateko arrazoi izan diren baldintzak ez-betetzea dela joko da.

**41 artikulua.— Jakinarazpen elektronikoa**

Ekonomi eta Lurralde Garapena Sustatzeko Sailak interesdunei jakinarazpenak egi-tean, bide elektronikoak erabili beharko ditu, 39/2015 Legearen 40. eta hurrengo artiku-luen arabera.

Bitarteko elektronikoen bidez egiten diren jakinarazpenak Bizkaiko Foru Aldundiaren egoitza elektronikoan (<https://www.ebizkaia.eus>) bertaratuz egin beharko dira, Adminis-trazio Elektronikoari buruzko Bizkaiko Foru Aldundiaren maiatzaren 5eko 62/2015 Foru Dekretuaren arabera, eta Herri Administrazioarako eta Erakunde Harremanetarako Foru diputatuaren ekainaren 6ko 4841/2016 Foru Aginduaren arabera (foru agindu hori jakina-razpenak eta komunikazioak Bizkaiko Foru Aldundiaren egoitza elektronikoan agertzeko sistemaren bidez egiteari buruzkoa da).

**IV. TITULUA****DIRU-LAGUNTZEN KUDEAKETA  
ETA EGIAZTAPENARI BURUZKO XEDAPEN OROKORRAK****42. artikulua.— Azpikontratazioa**

Pertsona edo erakunde onuradun batek azpikontratazioa egin duela ulertuko da diru-la-guntzaren xedea den jarduera zati batez edo osorik egitea beste norbaitekin kontratatzen duenean. Kontzeptu honetatik kanpo geratuko da pertsona edo erakunde onuradunak be-rak bakarrik diruz lagundutako jarduera egiteko dauzkan gastuak kontratatzea. Ondorioz, makinak, ekipamendua eta material suntsigarriak erostea, diruz lagundutako jardueraren barruan lan zehatzak egiteko kanpoko zerbitzuak kontratatzea, eta diruz laguntzen den jardueraren beste gastu osagarri batzuk egitea ez da azpikontrataziotzat joko.

Diruz laguntzen diren zerbitzu edo proiektuetako jardueren % 100eraino azpikontra-tatu ahal da, baldin eta 5/2005 Foru Arauaren 27. artikuluan ezarritako baldintzak eta debekuak errespetatzen badira.



4/2005 Legean eta 4/2018 Foru Arauan xedatutakoaren arabera, diru-laguntzaren xedea gauzatzeko agindua jasotzen duten erakundeek lege horretan ezarritako printzipio orokorrak errespetatu beharko dituzte, bere lanaren barruko estatistikak genero ikuspegiaren arabera egokitu beharko dituzte, ez dute hizkera sexistarik erabiliko eta emakumeen eta gizonen ordezkariak orekatua bermatu beharko dute eratzten diren batzordeetan eta lan taldeetan.

Diru-laguntzaren erakunde onuradunak diru-laguntzari dagokion jardueraren zati bat hirugarrenekin ituntzen dituzte, jarduera diru-laguntzaren zenbatekoaren %20 baino gehiago bada eta, gainera, azpikontratazioaren prezioa 60.000 euro baino gehiagokoa bada, erakunde onuradunak Bizkaiko Foru Aldundiari eskatu beharko dio azpikontratazio hori egin ahal izatea; horretarako, haren baldintza nagusiak eta zein erakunderekin itundu den jarduera burutzea adierazi beharko dira.

Enpresak Sustatzeko eta Ekonomia Garatzeko Zuzendaritza Nagusiak ebatziko du eskabidea, hamabost (15) eguneko epean. Epe horretan berriazko ebazpenik eman ezean eskabideari ezetsi zaiola pentsatuko da.

#### **43. artikulua.— Eskaintza aukeratzea**

Diru-laguntza jaso dezakeen gastuaren zenbatekoa azaroaren 8ko 9/2017 Sektore Publikoko Kontratuari buruzko Legean kontratuak txikitat hartzeko finkatzen diren zenbatekoa (40.000 eurotik beherakoa, obra-kontratuak badira eta 15.000 eurotik beherakoa, hornitze- edo zerbitzu-kontratuak badira) baino gehiagokoa bada, pertsona onuradunak hiru hornitzailearen eskaintzak eskatu beharko ditu gutxienez, zerbitzua egiteko edo ondasuna emateko konpromisoa hartu baino lehen. Hori ez da beharrezkoa izango baldin eta, diru-laguntza jaso dezaketen gastuen ezaugarri bereziengatik, merkatuan ondasun eta zerbitzuok hornitu edo egiten dituen hainbeste entitaterik ez badago, edo gastua diru-laguntza eskatu baino lehen egin bada.

Aurkeztutako eskaintzak egiaztagirian edo, egotekotan, diru-laguntzaren eskaeran aurkeztu behar dira. Eskaintza horien arteko aukeraketa eraginkortasun eta ekonomi irizpideen arabera egingo da. Proposamenik merkeena ez baldin bada aukeratzeko, zergatia memoria batean berriaz bidezko behar da.

#### **44. artikulua.— Jarraipena**

1. Foru dekretu honetan aurreikusten diren diru-laguntzak eskuratuko dituzten pertsonak edo erakundeek lagunduko diren jarduerak gauzatu direla eta diru-laguntza jasotzeko baldintzak betetzen dituztela agiri bidez frogatu beharko dute. Hori guztia egin beharko dute foru dekretu honetan, dagokion deialdian nahiz esleipena dakarren foru aginduan aurreikusten den moduan eta Ekonomi eta Lurralde Garapena Sustatzeko Sailak nahiz, kasuan kasu, dagokion erakunde laguntzaileak eskatzen duen unean frogatu beharko dira.

Hala, 4/2005 Legean eta 4/2018 Foru Arauan xedatutakoaren arabera, diru-laguntza jasoko duten pertsona edo erakundeek lege horretan ezarritako printzipio orokorrak errespetatu beharko dituzte, beren lanaren barruko estatistikak genero ikuspegiaren arabera egokitu beharko dituzte, ez dute hizkera sexistarik erabiliko eta emakumeen eta gizonen ordezkariak orekatua bermatu beharko dute eratzten diren batzordeetan eta lan taldeetan.

Justifikazioa ez bada ezarritako epean aurkezten, diru-laguntza itzultzeko eskatuko da, eta 5/2005 Foru Arauan ezarritako gainerako erantzukizunak ere eskatuko dira.

2. Diru-laguntza ematen duen organoak emate-erabakia ofizios aldatu ahal izango du funtsak aplikatu aurretik eta interesdunak esan beharrezkoa entzun ondoren. Erabakia ofizios aldatu ahal izango da diru-laguntza emateko betekizunetako bat aldatu egin bada eta, ondorioz, xedatutako hartu izan den interes publikoa bete ezin bada edo betetzeko zailtasunak izan baditu eta, bide batez, onuradun gertatu den pertsonari edo erakundeari kalte ekonomikoak eragin ez bazaizkio.

3. Organo instruktoreak entzunaldien egutegia ezar dezake Egitaraura aurkeztu diren proiektuen organo instruktorearen aurrean nahi izanez gero azalpenak aurkezteko.



Halaber, Ekonomi eta Lurralde Garapena Sustatzeko Sailak aurkeztutako eskabi-deak ondo ulertu eta ebaluatzeko eta proiektuen garapenari buruzko ondorengo justifikazioetarako beharrezkotzat jotzen dituen agiri edo/eta informazio osagarri guztiak eskatu ahal izango dizkio eskatzaileari.

4. Onuradun gertatu diren pertsonak edo erakundeek, halaber, laguntza ematen duen erakundeari diru-laguntzak emateko ebazpena aldatzeko eska diezaioke diruz lagundutako jarduera gauzatzeko epea amaitu aurretik, betiere aipatu berri dugun aldatetaren bidez aldeztu aurretik ezarritako epeak luzatu nahi badira, emandako diru-laguntzaren zenbatekoa murriztu nahi bada edo jardueraren barne dauden egintzak aldatu nahi badira. Eskaera horiek baimena jasoko dute aurretik ikusi ez diren baldintzak gertatzen badira, betiere diru-laguntzaren xedea aldatzen ez bada eta hirugarren pertsonen eskubideak urratzen ez badira.

Epeen luzapena 39/2015 Legearen 32. artikuluan ezartzen duenaren arabera egingo da. Beraz, epeak luzatzeko eskaera eta erabakia dagokien epea bukatu baino lehen egin beharko dira eta luzapena ezingo da hasieran ezarritako epearen erdia baino handiagoa izan. Era berean, epeen luzapena emateko edo ukatzeko ebazpenak ezingo zaie helegitea jarri, beti ere prozedura amaitzen duen ebazpenari jar dakiokiena ez bada.

Kasu horietan, onuradun gertatu den pertsonak edo erakundeak jaso duen eta frogatu ez duen diru-kopurua bueltatu beharko du, baita dagokion berandutze-interesa ere.

5. Halaber, Ekonomi eta Lurralde Garapena Sustatzeko Sailak eskatu ahal izango dizkio Programaren emaitzak egoki ebaluatzeko beharrezkotzat jotzen dituen agiri edota informazio osagarriak entitate onuradunari lagundutako proiektuaren amaieratik eta hurrengo hiru urteetan.

#### **45. artikulua. — *Justifikatzeko modua***

Diru-laguntzak ezarritako agiriak aurkeztuz justifikatu behar dira.

Justifikazioa Internet bidez aurkeztu behar da, atal guztiak behar bezala beteta. Horretarako, galdetegi bat bate behar da, Ekonomi eta Lurralde Garapena Sustatzeko Sailaren web orrian dagoena, bulego birtualean (<http://www.bizkaia.eus/sustapena-bulego-birtuala>).

Justifikazioa egiteko epea igarota, ez bada justifikaziorik aurkeztu organo instrukzio-egilearen aurrean, organoak erakunde onuradunari eskatuko dio hamabost (15) eguneko epean aurkez dezala. Epe hori ezingo da luzatu. Justifikazioa ez bada ezarritako epean aurkezten, diru-laguntza itzultzeko eskatuko da, eta 5/2005 Foru Arauaren 37. artikuluan eta hurrengoetan ezarritako gainerako erantzukizunak ere eskatuko dira.

#### **46. artikulua. — *Baldintzak aldatzea***

Pertsona edo erakunde onuradunak jakinarazi beharko du diru laguntza ematean aintzat hartu ziren edozein inguruabar objektibo zein subjektiboren gaineko gertatu diren aldaketa guztiak.

Pertsona edo erakunde onuradunak, bidezkoketa egiterakoan, azaltzen badu diru-laguntza emateko kontuan izan diren baldintzetan aldatetaren bat gertatu dela eta horrek ebazpena aldatzea ekar lezakeela, dekretu honen 44. artikuluan araututakoarekin bat etorritik, hura onetsi aurretik egin beharreko administrazio baimeneko izapidea bete gabe, diru-laguntzak ematen dituen organoak aurkeztu den bidezkoketa onartuko du, beti ere beste pertsonen eskubideak urratzen ez ba ditu; horrek, ordea, ez du pertsona edo erakunde onuraduna salbuetsiko 5/2005 Foru Arauaren arabera dagozkion zehapenetatik.





## V. TITULUA

**DIRU-LAGUNTZAK ITZULTZEA  
ETA ARAU HAUSTE ADMINISTRATIBOAK**

## I. KAPITULUA

**DIRU-LAGUNTZAK ITZULTZEA****47. artikulua.— Diru-laguntza erakunde onuradunak berak itzultzea**

Borondatezko itzulketa da onuradunak Administrazioaren inolako aldez aurretiko errekerimendurik gabe egiten duena.

Borondatezko itzulketa egiten denean, Administrazioak dagozkion berandutze-interesak kalkulatuko ditu, 5/2005 Foru Arauaren 34. artikuluan ezarritakoaren arabera eta onuradunak itzulketa benetan egin duen unera arte.

Onuradunak berak eskatuta diru-laguntza itzultzeko, Bizkaiko Foru Aldundiaren eredu ofizialaren arabera ordainketa-gutuna erabili behar da; gutun hori Ekonomi eta Lurralde Garapena Sustatzeko Sailaren bulegoetan (Orueta apezpikuaren kalea, 6, Bilbo) egingo da.

**48. artikulua.— Ez betetzeak**

Foru dekretu honetan nahiz aplika daitezkeen bestelako arauetan ezarri diren baldintzak zein, kasuan kasukoa, ebazpenean ezartzen direnak betetzen ez badira, jasotako zenbatekoak itzuli egin beharko dira; baita, kasuan kasukoa, kopuru horien interesak ere. Halaxe adierazten baita 5/2005 Foru Arauaren II eta IV tituluetan, dagozkion legezko ekintzen eta zehapenen kalterik gabe. Aipatutako zenbatekoak, diru-sarrera publikotzat hartuko dira ondorio guztietarako.

**49. artikulua.— Ez betetzeak mailakatzeko irizpideak**

Beste diru-laguntza batzuk ere jaso, eta gain-finantzazioa gertatuko balitz, gehiegizko diru-kopurua itzuli beharko du, halaxe ezartzen baita 5/2005 Foru Arauaren 18.3 artikuluan. Kopuru horri, gainera, dagokion berandutza-interesa aplikatuko zaio.

Emandako diru-laguntzaren zenbatekoa eskatzaileak aurkeztutako aurrekontu baten gaineko ehuneko bat aplikatuta lortzen denez, behin betiko kostu osoa hasierako aurrekontua baino txikiagoa bada, honako hau itzuli behar da: hasierako aurrekontuaren gaineko ehuneko hori aplikatuta lortutako kopuruari behin betiko kostua kentzearen ondorioz finantziario publikoan sortutako soberakina.

Baldintzetako bat edo batzuk ez betetzeak edo epearen barruan jardueraren zati bat bakarrik egiteak (betiere, zalantza barik egiaztatzen bada onuradunak konpromisoak betetzeko asmoa duela) diru-laguntzaren zati bat bakarrik ordaintzea ekarriko du edo, hala badagokio, diru-laguntzaren zati bat itzuli behar izatea. Itzulketa hori kalkulatzeko, jarduera osotik hartutako zatiaren proportzio bera erabiliko da.

Helburua betetzen ez bada, hala diruz lagundutako proiektua, nola haren zati handi bat ez egiteagatik, finantza-gastuetarako emandako diru-laguntza itzuliko da, nahiz eta finantza-erakundeak EELIF Berrikuntza Funtsetik emandako maileguren kuotak ordainduta izan.

Beaz, S.A.U sozietateari badagokio funtsak banatzea eta justifikatutako gastua aurrekontuko gastua baino txikiagoa izateagatik itzultzeko espediente bat ebatzi bada, ebazpen hori erakunde laguntzaileari jakinaraziko zaio, sobera geratutako funtsak itzul ditzan. Kasu horretan, ez da interesik aplikatuko.

Era berean, finantza-gastuetarako diru-laguntza eman bada eta zenbatekoa Elkargi EEE erakundeari eman bazaio, itzulketa egin bada helburua osorik ez betetzeagatik edo benetako finantza-gastuak diruz lagundutakoak baino txikiagoak direlako, orduan erakunde onuradunari eta Elkargi EEEri jakinaraziko zaie ebazpena. Haiek maileguaren interesei dagokien zenbatekoa itzuliko dute (sortutakoak eta sortutako gabekoak, hurrenez hurren).



Foru Dekretu honen 48. artikuluko kasuetan, pertsona edo erakunde onuradunak, hala badagokio, jaso dituen baina justifikatu ez dituen kopuruak itzuli beharko ditu, bai eta dagokion berandutze-interesa ere.

Administrazioak eginiko egiaztapen edo finantza-kontrol baten ondorioz ikusten bada eginiko gastuetako batzuk edo guztiak ordaindu gabe daudela eta hartzekodunek eskatzeko eskubidea dutela, itzulketa eskatuko da, proportzionaltasun-printzipioa aplikatuta. Kasu horretan, diru-laguntza jaso dezaketen egotzitako gastu guztietatik ordaindu gabeko gastuek osatzen duten proportzioaren arabera izango da diru-laguntzaren itzulketa.

## II. KAPITULUA

### DIRU-LAGUNTZEI DAGOZKIEN ARAU-HAUSTE ADMINISTRATIBOAK

#### 50. artikulua. — *Zehapen-prozedura*

5/2005 Foru Arauaren IV. tituluaren ezarritakoa bete beharko da.

39/2015 Legean ezarritakoari jarraituko zaio, bai eta Euskal Autonomia Erkidegoko Herri Administrazioen zigortzeko ahalmenari buruzko otsailaren 20ko 2/1998 Legean xedatutakoari ere, aurrekoari aurka egiten ez dionean.

#### 51. artikulua. — *Deslokalizazioa*

Enpresa eta erakunde onuradunek enpresako deslokalizaziorik ez egiteko konpromisoa hartzen dute; deslokalizaziotzat Enpresako deslokalizazio kasuetan foru sektore publikoko laguntzak berreskuratzeari buruzko martxoaren 27ko 7/2007 Foru Arauan xedatutakoa jotzen da; foru araua dekretu honek araututako diru-laguntzentzat guztiz aplikagarria izango da.

Konpromisoa ez betetzea Bizkaiko Foru Aldundiaren akordioaren bidez ebatziko da, eta emandako diru-laguntza itzuli behar izateko zioa izango da, aipatu foru arauan xedatutako prozedura aplikatuz.

### XEDAPEN IRAGANKORRAK

#### Xedapen Iragankor Bakarra. — *Jakinarazpen elektronikoa*

41. artikuluan ezarritako jakinarazpen elektronikoari buruzko betebeharrari dagokionez, jakinarazpena egiten denean bitarteko elektronikoen bitartez egiteko prozedura ez badago teknikoki amaituta, jakinarazpena paperean egingo da, posta ziurtatuaren bidez.

### AZKEN XEDAPENAK

#### Lehen Azken Xedapenak. — *Ezarri beharreko arautegi orokorra*

Foru dekretu honetan aipatutako laguntzei dagokienez, aginduzkoak izango dira dekretu honetako xedapenak, laguntzak emateko foru aginduetan ezartzen diren gainerako baldintzak, 5/2005 Foru Arauaren xedapenak eta Diru-laguntzen Erregelamendua, eta estatuko edo erkidegoko gainerako arau aplikagarriak.

Era berean, 39/2015 Legea erabiliko da.

Bizkaiko Gardentasunari buruzko otsailaren 17ko 1/2016 Foru Arauaren 2. artikulua-  
ren arabera, arau horren 8, 9 eta 10 artikuluetan jasotako gardentasun eta publizitatearen inguruko betebeharrak erakunde pribatu hauei aplikatuko zaizkie: aurrekontu-ekitaldi baten zehar Bizkaiko Foru Aldundiaren 100.000 euro edo gehiagoko laguntzak edo diru-laguntzak jasotzen dituztenei edo urteko diru-sarreraren %40 Aldundiaren laguntzetatik edo diru-laguntzetatik jasotzen dutenei, betiere gutxienez 5.000 euro badira.

Interesdunak ematen dituen datuak foru-dekretu honetatik eratortzen diren prozedurak kudeatzeko erabiliko dira, kontuan harturik zer ezartzen den honako araudi honetan: 2016/679 Erregelamendua (EB), 2016ko apirilaren 27koa, Europako Parlamentuarena eta Kontseiluarena, datu pertsonalen tratamenduari eta datu horien zirkulazio askeari



dagokienez pertsona fisikoak babesteari buruzkoa, eta 95/46/CE Zuzentaraua indargabetzen duena (Datuak babesteko erregelamendu orokorra) eta 3/2018 Lege Organikoan.

Datu horiek inola ere ez dira erabiliko, eta ez zaizkie hirugarren batzuei lagako, interesdunak argi eta garbi ados dagoela adierazi ezean edo goian aipaturiko araudian ezarzen diren kasuetan izan ezik. Araudi horretan xedatzen dena betetzeko, interesdunak honako eskubide hauek baliatu ahal izango ditu datuen tratamenduaren arduradunaren aurrean: datuak eskuratzeko, zuzentzeko, ezerezteko («ahaztua izateko eskubidea»), haien tratamendua mugatzeko eta datuok eramangarri izateko eskubideak, bai eta tratamendu automatizatuan soilik oinarrituriko erabakirik ez jasatekoa (barne harturik profilen sorrera), baldin eta erabakiak eragin juridikoak badakarzkio edo, modu bertsuan, beragan eragin nabarmenik badu. Era berean, edozein momentutan erreboka dezake lehen adierazitako onarpena. Halaber izango du eskubidea erreklamazioa aurkezteko Datuen Babesaren Kontrol Agintaritzaren aurrean».

### **Bigarren Azken Xedapenak. — *Arauen garapena***

Ekonomi eta Lurralde Garapena Sustatzeko Saileko diputatuak ahalmena izango du honako foru dekretu hau garatzeko beharrezkotzat jotzen dituen xedapen guztiak emateko, bai eta, aurrekontu-zuzkidura amaitu ezean, deialdi berriak egiteko ere.

### **Hirugarrena Azken Xedapenak. — *Aurrekontuko zuzkidura***

Deialdi honetan eman daitezkeen laguntzak eta onurak (guztira 5.349.550,00 euro) jarraian zerrendatuko diren aurrekontu-partidetan, aurrekontu proiektu eta urtekoetatik ordainduko dira; gutxi gorabeherako kopuruetan banakatuta agertuko dira, eta muga partida bakoitzean ezarritako guztizko kopurua izango da:

<b>Berrikuntza proiekturen gauzatze kostuentzako diru laguntzak</b>	
08.02/74300/426.107	
Proiektu zk.: 2016/0055	
Ekitaldia	Zenbatekoa (€)
2019	2.849.550,00
2020	2.000.000,00
GUZTIRA	4.849.550,00

<b>Berrikuntza proiekturen finantzatze kostuentzako diru laguntzak</b>	
08.02/44300/426.107	
Proiektu zk.: 2016/0055	
Ekitaldia	Zenbatekoa (€)
2019	0,00
2020	500.000,00
GUZTIRA	500.000,00

Aurrekontuko partidei esleitutako kopuruak gutxi gorabeherakoak dira. Onartzen diren eskabideen arabera —pertsona eta erakunde onuradunen izaera juridikoak eta diruz lagundutako gastuen kontzeptuak askotarikoak izan daitezke—, aurrekontuko partidei esleitutako baliabide ekonomikoak egokitu ahal izango dira. Horretarako, ez da beharrezkoa izango foru dekretu hau aldatzea, betiere partiden zenbateko osoak ezarritako muga gainditzen ez badu.

Diru-laguntzen erregelamenduaren 43. artikulua babesean aurrekontuko zuzkiduren guztizko zenbatekoa areagotu ahal izango da, gehienez ere 2.000.000,00 euro gehituz, baldin eta eskuragarri dauden kredituak areagotu badira kreditua handitzea onartu



delako edo kreditua sortu edo gehitu delako edo baldin eta kopuru osagarri bat badago aurreko deialdietan aurkeztutako eskaeren zenbatekoa aurrez ikusitakoa baino txikiagoa izan delako; kasu horietan, kreditu osagarri hori soilik izango da eraginkorra baldin eta kreditu horren erabilgarritasuna adierazita badago. Adierazpen hori diru-laguntza emateko ebazpena eman aurretik egin beharko da. Organo eskudunak baimenduko du kopuru handitze hori.

**Laugarrena Azken Xedapenak.— Indarrean jartzea**

Foru dekretu hau Bizkaiko Aldizkari Ofizialean argitaratu eta biharamunean jarriko da indarrean.

Bilbon, 2019ko martxoaren 20an.

Ekonomi eta Lurralde Garapena  
Sustatzeko foru diputatua,  
IMANOL PRADALES GIL

Ahaldun Nagusia,  
UNAI REMENTERIA MAIZ

**I. ERANSKINA**

Foru dekretu honetako 3. artikuluan adierazitakoaren arabera, onuradun izateko, beste baldintza batzuen artean, enpresek EJSN-2009ko (apirilaren 13ko 475/2007 Errege Dekretua, apirilaren 28ko 102. EAOan argitaratua) epigrafe hauetakoren batean inskribatuta eduki behar dute euren jarduera ekonomiko nagusia

- B atala: Erauzketako industriak.
- C atala: Manufaktura-industria.
- D atala: Indar elektriko, gas, lurrun eta aire girotuko hornitura.
- E atala: Ur hurnidura, saneamendu jarduerak, hondakinen kudeaketa eta deskontaminazioa.
- F atala: Eraikuntza (talde hau izan ezik):
  - 41.1. taldea. Higiezinaren sustapena.
- G atala: Handizkako eta txikizkako merkataritza; ibilgailu motordunen eta motozikleten konponketa (multzo hau izan ezik):
  - 47. multzoa. Txikizkako merkataritza, motordun ibilgailuak eta motozikletak izan ezik.
- H atala: Garraioa eta biltegiatzea.
- I atala: Ostalaritza (talde hau izan ezik):
  - 56.3. taldea. Edaritegiak.
- J atala: Informazioa eta komunikazioak.
- M atala: Jarduera profesionaletan, zientifiko eta teknikoak.
- N atala: Administrazio jarduerak eta zerbitzu lagungarriak (multzo hau izan ezik):
  - 80. multzoa. Segurtasun eta ikerketa jarduerak.
- P atala: Hezkuntza (multzo hau baino ez):
  - 85.6. multzoa. Hezkuntzako jarduerak lagungarriak.
- Q atala: Osasun jarduerak eta gizarte zerbitzuak (multzo hauek baino ez):
  - 87. multzoa. Egoitzetako laguntza.
  - 88. multzoa. Ostaturik gabeko gizarte zerbitzuetako jarduerak.
- R atala: Arte, aisialdi eta denbora-pasako jarduerak (multzo eta talde hauek baino ez):
  - 90. multzoa: Sormen, arte eta ikuskizunen jarduerak.
  - 91. multzoa: Liburutegi, artxibategi eta museoetako jarduerak eta beste kultura jarduerak batzuk.
  - 93.2 taldea: Aisialdi eta entretenimendu jarduerak.
- S atala: Bestelako jarduerak (multzo hau baino ez):
  - 95. multzoa. Ordenagailuen, norberaren gauzen eta etxeko gauzen konponketa.

Salbuespenez, interes nabarmena duten proiektuak direnean, aurreko epigrafeetan agertzen direnez bestelako jarduerak nagusia duten enpresak ere onuradun izan ahaliko dira, Ekonomi eta Lurralde Garapena Sustatzeko Saileko foru diputatuaren ebazpen arrazoituaren bitartez.